

Վեշտասան տնով յաւարտ ունի,
 Հրամանաւ Լավցոց դատաւորի·
 Վասն ամբուքեան դատաստանի·
 Ամէն, ամէն եւ եղիցի:

Հայերի բացարձակ ինքնավարութիւնը բնաւ հաճելի չէր Լվովի քաղաքային ինքնավարութեան, որը անհաշիւ դատեր ունէր նրանց դէմ եւ յամառօրէն պահանջում էր, որ հայերն էլ ենթարկուին համաքաղաքային վարչութեան եւ ընդհանուր քաղաքային դատարանին:

Հետզհետէ արքայական հրամանագրերը սահմանափակում են հայոց դատարանի իրաւասութիւնները, ժե դարի վերջերին, առնելով նրանց ձեռքից բոլոր քրէական գործերը, իսկ 1510 թուին՝ նաեւ անշարժ գոյքերին վերաբերուող բոլոր գործերը: Հայկական դատարանները պահեցին իրենց գոյութիւնը, բայց նրանց նախագահը այլեւս ոչ թէ հայերից ընտրուած վոյթն էր, այլ քաղաքի ընդհանուր վոյթը, որը նախագահում էր հայ աւագներից բաղկացած հայկական դատարանում:

Մօտաւորապէս նոյն ժամանակները, 1519 թ., Սիգիզմունդ Ա. թագաւորը հաստատեց «Հայկական օրինագիրքը», հայկական օրէնքների մի ժողովածու, որով պէտք է ղեկավարուէին հայկական դատարանները: Այս օրինագիրքը պարունակում է Մխիթար Գոշի «Գատաստանագրքից» առնուած մի շարք զուտ հայկական օրէնքներ՝ լրացուած Գալիցիայի կեանքում կիրառուող մազդեբուրգեան իրաւունքի մասերով:

Խաղաղ ժամանակ Լեհաստանի քաղաքային կեանքը կարգաւորող վերոյիշեալ հիմնարկութիւններից զատ արտակարգ պարագաներում, երբ ամբողջ քաղաքի շահերը չօչափող խնդիրներ էին առաջ գալիս, Լվով քաղաքում գումարում էր, այսպէս կոչուած, ընդհա-

նուր նստաշրջանը, որ բաղկացած էր բոլոր դասերի ներկայացուցիչներից: 1622 թ., երբ մշակուած էին նման նստաշրջանի համար տալիք հրահանգները, որոշուեց եւ քուէարկութեան կարգը. առաջինը իրենց քուէն տալիս էին քաղաքային դատարանի անդամները, երկրորդ՝ հայ աւագները: Հայերից յետոյ երկու քուէ էր տալիս քառասուն այրերի կողմէիան (մէկ քուէ վաճառականներից, մէկ՝ արհեստաւորներից) եւ, վերջապէս, ուսուիները:

Եւան Սորեսկի թագաւորի օրով, երբ թիւրքերը արշաւում էին Լեհաստանի վրայ՝ սպառնալով վերջինիս գոյութեան, երբ պատերազմական ծախսերը ծայր աստիճանի մեծացան եւ 1689 թ. կազմուեց յատուկ մի յանձնաժողով Լվովի բնակչութեան վրայ դերուելիք տուրքը բաշխելու համար, 12 հոգի-նոց այդ յանձնաժողովի մէջ քաղաքային վարչութիւնից մտան 2 ներկայացուցիչ, քաղաքային դատարանից՝ 1, քառասուն այրերի կողմէիայից՝ 4, հայերից՝ 3 եւ ուսուիներից՝ 2:

Այս թուերն ինքնին բաւական են տեսնելու համար, թէ հայերը ի՞նչ կարեւոր տեղ էին զբաւում Լվով քաղաքի կեանքում:

(Շարունակելի)

